

中州名賢集



中州名賢集



國朝中州名賢集卷四

仲誠張先生文鈔目錄

性道教論

溯流史學鈔說

立志

遊梁書院講話四篇

存養

窮理

力行

敦臨堂訓語

敦臨堂訓語

天中書院訓士

與楊畏公書

與王憲揆札

與黃維福書

示孫亦公帖

與司野文書

答耿保汝書

與楊畏公書

答孫宗誠問

諸生問答

答諸生問佛老

黃氏家譜序

楚南湘潭後學黃舒曷編輯

國朝中州名賢集卷四

仲誠張先生文鈔

性道教論

性也道也教也一而已此性善本體人所同具而獨靈貴於萬物者有如是也天命之性無容說謂無所有也迨其有而可說則便是率性之道矣率性之道則一陽修道之教則一陰一陽順生一陰逆成而萬理出萬事得矣順生之性天命之蓋命之以順而自生之理也逆成之性亦天命之蓋命之以逆而後成之理也順生者不學而能不慮而知孟子謂之良知良能逆成者則

卽不學之能不慮之知而學焉則能愈出慮焉則知愈精孟子所謂達之天下也不學不慮天之所以與我能學能慮獨非天之所以與我乎天生性性生道道生教教復天道亦性教亦性率修之異卒無異特分順逆而已矣今夫人感物遇事則性之靈率然出而應之率也而思審其物化裁其事之念亦卽從之修也率之機動卽修之念所由起修之力竟卽率之體所由成由此復率復修循環無端故曰一陰一陽之謂道苟率而不修一任性之自動而不竟其思審化裁之力則感物而發者又感物而變矣又感物而助其長矣率卽孟子所謂

情則可以爲善者可以爲而不爲亦可以不善故言率
而不言修其於性也猶未全而遂以開性有不善之論
可謂誤之甚矣修卽孟子所謂才則能爲善而愈爲愈
善者能爲善而不爲焉豈才之罪哉愈爲愈善不爲不
善而或相倍蓰不能盡其才者也必盡其才焉而性善
見矣情之爲性也引其端而才之爲性也要其成然天
下多得其半而棄其半何故歟情發於天而自然者爲
政才續於人而力行者爲政而人樂其逸而惡其勞而
卒未達夫易者之不簡簡者之不易也自然者乾以健
而易知力行者坤以順而簡能率者率其易故曰乾天

下之至健也修者修其簡故曰坤天下之至順也率性之謂乾修道之謂坤一率一修之謂變往來不窮之謂通任乎天而不盡人率而不修得半而棄半者凡民也賢人全用之一率一修變而已蓋猶有間也聖人則卽率卽修卽修卽率流行不息非天下之至通其孰能與於此哉天者不息之宰也性者不息之理也道者不息之迹也教者不息之傳也今夫人饑而食渴而飲以爲性也使不耕不鑿則饑渴之民皆死矣而不敢以耕鑿爲性者徒見其出於委曲也不知此耕鑿之與饑渴乃一呼一吸之相維呼自內出吸自外入苟謂自外入者

非吾本有而裂而絕之其有能全吾呼者未之有矣噫
養固如是而何獨疑於教乎夫道亦在乎修之而已矣
生知安行乎修者上也學知利行乎修者次也困知勉
行乎修者又其次也困而不修民斯爲下矣今世儒者
每謂生安爲率性學困爲修道然則堯舜者生安之至
也其所稱允執兢業者豈無此事而爲此言以作欺者
乎非第堯舜天地萬物亦然獨天地萬物多不能自修
而賴乎人以修之則何也蓋自天以修道之教命之人
而已將天地萬物之所不能竝命之矣人者天地之德
也陰陽之端也鬼神之會也五行之秀氣也爲其能修

道言之也有性而無率者木石之性也能率而不能修者禽獸之性也故曰人之所以異於禽獸者幾希

溯流史學鈔說

溯流史者余之日記課本也始己亥遊江淮於舟中感水哉水哉之意製冊而名凡自己日間言行及所見聞天地古今人物山川旅遇之異及一切友朋往復之書劄辨論之言語無弗記載而皆寓得失懲勸於中欲其心勿忘如水之流不可斷裂也偶忘卽揭冊視之以自治也從學士子往往摘其談學款段好爲翻閱因命簡選可者挨年順月鈔錄成本以便講習而各屬以所在地爲某錄云錄中不論人言已言但有益於學者卽存之迄今甲戌余耄矣言不能盡意書院諸生喜有此書

以代余言爭相鈔錄不得又別無副本衆議付梓有謂
宜分類各詳一說之始末者有謂仍宜俟順時月不失
溯流之義者於是從其後說名爲溯流史學鈔并附遊
梁講語爲二十卷則余學之得失淺深隨時而見於言
論者無容隱飾而學者亦可卽余之因時加進以求學
之所從入而從得者矣此錄起丁未以前載學道六書
中著蔡張沐自記

立志 遊梁書院講語第一

志者至上之氣也此天命於人之性自生此一段志氣
出來願善不願惡願爲君子不願爲小人所謂人之秉
彝好是懿德也今謂人曰爾惡爾小人必憤怒不受此
本來一念最強最卓又最真慤無一毫假僞學者爲學
亦必從此處學起要立住這箇志使不走作便是人生
一箇本源如木之有根自然滋長漸成棟梁之材如水
之有源自然流去漸成渠川達乎大海雖以孔子之聖
亦必十五志學三十而立後方有進其教人先在志於
道顏子必仰鑽瞻忽有此志了方教以博文約禮學記

曰士先志大學古人爲學次第而明德親民入手功夫在止至善亦是立志如此志定了而後能靜安慮得中庸未發之中亦是闡然中先立箇志以爲天下之大本故篇末結言可與入德矣卽引內省不疚無惡於志以釋之則立志爲第一層功夫豈不信哉而今學者未有立志功夫如何想有善無惡爲君子而不爲小人乎言之甚可懼然又有說志旣是天命率性的物似宜聽他自會立緣何又要我去立他所以異端家反說聖人多事這正是異學不明心性處性不是一物性字從心從生乃心生生之機耳至虛至靈有感卽生如乍見之惻

隱怵惕初感必生善念卽志之端未幾別感又生不善
初志自是難立然此虛靈之性層層會生於是又生出
良知來以察識吾志又生出良能來以持守吾志是因
不立乃又生立也是這立的功夫亦性之自生天所命
也故易大有曰君子以遏惡揚善順天休命天本命人
以知能功夫乃其休美之命而君子奉順之故異端家
不識性也問立之功如何曰如在親前生孝的志便每
日將此孝志立一立教定在君前生忠的志便每日將
此忠志立一立教定在民物上生仁愛的志便每日將
此志立一立教定如此自不走作若不用立的功夫偶